

Moins hott merr so komische Gedonke

Ess iss schunn e paar Daach her, doo hadde merrs von de Winderzeit unn vom Schloofe. Josses naa, hott de Schorsch gesaat, ich brauch immer mindestens zwaa Woche um mich umzestelle. Die erst Zeit isses joo schee dass merr moins e Stund länger im Bett bleiwe kann, awwer wennde halt gewehnt bist um acht Uhr außem Bett ze krawwele, dann bisde nooch de nei Zeit schunn um siwwe so weit dassde uffsteie kennst unn dann liesde noch e Stund im Bett, host ausgeschloofe unn fängst oo ze simmeliern, unn grad so um die Zeit hott merr monchmol so Gedonke.

No, frächt de Karl, was hosde dann ferr Gedonke?

Ach no ja, moont de Schorsch, so komische Gedonke halt.

Ich guck de Schorsch oo unn grins unn frooch: Du bist bestimmt omm iwverleeche, was merr mett dere Stund oofonge kennt, so moins im Bett.

De Schorsch iss uff moi vorderlisdich Frooch garnit oigonge unn sächt: Wissder, ess iss doch eichtlich bleed, dass merr iwverhaupt schloofe muss. Was kennt merr in dere Zeit alles mache. Awwer was mächt merr acht Stunde long? – merr liet im Bett unn schläft. Warum iss dess so?

De Karl hott emm Ontwort gewwe: Ich denk halt, dess iss schunn gonz gut, dass merr nit alls doorum worscheidt, weil merr muss sich joo ausruhe.

Unn ich habb gesaat: Dess hott die Nadur so oigericht, weils joo aach dunkel werdd. Unn wens ei Weil dunkel iss werdd merr mied. Unn was macht merr wenn merr mied werdd? Merr gieht ins Bett unn schläft.

Dess waaß ich joo alles, sächt de Schorsch, awwer trotzdem, ess det doch aach longe, wenn merr nooch drei Stunde ausgeschloofe hätt.

Doo moont de Karl: Uff was willsden eichtlich enaus, Schorsch?

De Schorsch hott gemurmelt: In dere Zeit wo merr schloofe dut kennt merr was iwver die alte Grieche lese odder sich was iwver de dreißigjährige Kriech im Fernseh oogucke, so was Ähnliches halt.

Ich muss de Schorsch gonz entgeistert oogeguckt hawwe alser dess gesaat hott unn doo machder aach schunn weider: Ich waaß, so was habbder noch nie von mir geheert, awwer je älder merr werdd desdo mehr merkt merr was merr alles nit waaß. Ja, unn dess sinn moi komische Gedonke, dasses halt besser wär, merr hätt mehr Zeit ferr sich ze bilde um oofach mehr ze wisse. Ich habb halt immer nor mett moine Händ geschafft.

Schorsch, habb ich gesaat, jetzt heer awwer uff. Du waaßt selwer was du alles geleist host in doim Lewe. Doo iss doch ebbes onnerst debei, jetz saach emol was los iss.

De Schorsch hott erst erum gedruckst unn dann gesaat: Ei wenn ich mehr wisse det det ich emol gern beim Günther Jauch mettmache unn gewinne unn wens nor sechzehndausend Euro wärn.

De Karl war gonz baff. Dess also sinn doi komische Gedonke, jetz bin ich awwer platt. Schorsch, willsde gewinne weilde derr e nei Audo kaafe willst?

De Schorsch war gonz verleeche. Naa, dess Geld ferrs Audo habb ich dehoom. Naa, ich dets vom Jauch nemme unn det was kaafe, was dess Kättche gern hätt.

De Karl unn ich hawwen gleichzeitisch gefroocht: Unn was hätts Kättche gern?

Doo hott de Schorsch unner sich geguckt unn gepischbert: Ei e nei Schloofstubb. Eiern Honnes